

Dagangan borong, runcit September naik 6.5 peratus

Perdagangan borong dan runcit Malaysia mencatat nilai jualan sebanyak RM142.7 bilion, naik 6.5 peratus tahun ke tahun pada September, kata Jabatan Perangkaan Malaysia (DOSM).

Ketua Perangkawan, Datuk Seri Dr Mohd Uzir Mahidin, berkata bagi perbandingan suku tahunan, perdagangan borong dan runcit mencatatkan jualan sebanyak RM424.9 bilion pada suku ketiga, melonjak 6.8 peratus tahun ke tahun.

"Peningkatan sebanyak 6.5 peratus tahun ke tahun pada September 2023 disumbangkan oleh subsektor perdagangan borong yang meningkat 6.9 peratus atau RM4.1 bilion kepada RM64.2 bilion.

"Perdagangan runcit juga berkembang dengan mencatatkan 5.9 peratus atau RM3.4 bilion kepada RM61.1 bilion, diikuti oleh kenderaan bermotor dengan peningkatan 7.0 peratus atau RM1.1 bilion untuk berada pada RM17.5 bilion," katanya dalam satu kenyataan, semalam.

Mengulas lanjut, Mohd Uzir berkata, berdasarkan bulan ke bulan, peningkatan marginal 0.1 peratus direkodkan disokong oleh perdagangan runcit yang berkembang 0.9 peratus atau RM0.5 bilion, diikuti oleh perdagangan borong dengan 0.5 peratus atau RM0.3 bilion.

Sebaliknya beliau berkata, Kenderaan Bermotor merosot -3.6 peratus.

Prestasi mengikut subsektor pula katanya, merekodkan pertumbuhan 6.9 peratus tahun ke tahun bagi perdagangan borong disumbangkan oleh lain-lain pengkhususan jualan borong yang meningkat RM2.0 bilion atau 8.6 peratus kepada RM25.1 bilion.

Ini katanya, diikuti oleh Jualan Borong Makanan, Minuman & Tembakau (7.7 peratus), Jual Borong Bahan Mentah Pertanian & Haiwan Hidup (9.9 peratus), Jualan Borong Barangan Isi Rumah (4.0 peratus), Perdagangan Borong Tanpa Pengkhususan (6.6 peratus), Jual Borong Berdasarkan Kontrak atau Yuran (7.3 peratus) dan Jualan Borong Jentera, Peralatan & Bekalan (1.4 peratus).

Bagi prestasi suku tahunan, peningkatan 6.8 peratus tahun ke tahun pada suku ketiga bagi perdagangan borong & runcit didorong oleh perdagangan borong yang berkembang RM11.3 bilion atau 6.3 peratus kepada RM191.1 bilion.

"Ini diikuti oleh perdagangan runcit yang meningkat 5.9 peratus atau RM10.1 bilion untuk berada pada RM181.3 bilion.

"Subsektor kenderaan bermotor juga meningkat dengan merekodkan pertumbuhan dua digit 11.8 peratus atau RM5.6 bilion kepada RM52.5 bilion pada suku tahun ini.

"Bagi perbandingan suku tahun ke suku tahun, sektor ini meningkat 3.0 peratus," katanya.

Bagi perbandingan suku tahunan, perdagangan borong dan runcit mencatatkan jualan sebanyak RM424.9 bilion pada suku ketiga

Mohd Uzir Mahidin,
Ketua
Perangkawan

